



Inuit sulisinnaassusillit inuiaqatigiinnut arlaatigut tunniussaqaarnatik pisortat ikiorsiissutaannik pisannginnissaat qanoq qulakkiissaneripput pillugu apeqquteqaat allaavigalugu oqallinnissamik siunnersuut.

(Inatsisartunut ilaasortaq Simigaq Heilmann, Demokraatit)

Inatsisartunut ilaasortaq Simigaq Heilmann matumuuna pingaaruteqartumik, sapiissuseqartumillu oqallisissiamik siunnersuuteqarsimammat qutsavigaarput.

Demokraatit isumaat erseqqarilluinnarpoq. Nunatsinni inuiaqatigiinnut tunniussaqaarusunngitsunik innuttaqaratta iluaqutaanngilluinnarpoq, tamannalu iliuuseqarfigisariaqarparput.

Nunatsinni inuppassuit ullut tamaviisa ullaakkut makillutik suliarlorlutillu, atuariatortartut ataqqilluinnarpagut. Sulinermikkut inuiaqatigiinnut tunniussaqaartuarput. Assigisaannillu inuppassuit napparsimanertik, innarluuteqarnertik, utoqqalisimanertik il. il. peqqutigalugu sulisinnaanngitsut ataqqilluinnarpagut. Taakkorpiat eqimattaapput pitsanerpaamik inuuneqarsinnaanissaminut ikiugassaasut.

Illuatigullu aamma inunnik eqimattaqarpugut peqqissut sulisinnaangaluarlutik imaluunniit ilinniarsinnaangaluarlutik kisiannili eqiasuinnartut. Inuit taakku tassaapput nunaqqatiminut uagutsinnut ersoqatiginninngitsut, tassami tunniussaqaarsinnaangaluarlutik asuli eqiasuttuugamik. Tamannami ajorluinnartuuvoq, aammalu inuiaqatinut ataqqinninnginnerulluni.

Demokraatit taamaammat siunnersuuteqartoq isumaqatigilluinnarpaat inuit sulisinnaassusillit inuiaqatigiinnut arlaatigut tunniussaqaarnatik pisortat ikiorsiissutaannik pisannginnissaat aqqissuussamik qulakkeerinnittussamik pilersitsisariaqaratta.

Siunnersuuteqartoq oqallisissiamini periarfissat assigiinngitsut eqqartorpai, tamaasalu isumaqatigaagut. Inuimmi eqimattat ersoqatiginninngitsut taakkua ukkatarineruneqarnissaat takorusukkaluaqaarput. Eqqaamassuarpummi inuit taakkua suliaqaratik pilersorneqarunnaarlutik sulileraangata inuiaqatigiit 140.000 koruuniniit 200.000-koruunit tungaanut sipaaruteqarsinnaasarmata. Eqqaamassuarput suliffeqarmat avataaniik sulisussaminik tikisitsisoqartartunik aamma peqarmat. Tamanna imminut ataqatigiinngilaq. Inuiaqatigiittut akimanerulissangaluarpugut inuit amerlanerit inuiaqatigiinnut tunniussaqaqaleraluarpata.



DEMOKRAATIT
DEMOKRATERNE

Inatsisartunut ilaasortaq Simigaq Heilmann matumuuna sammisaq pingaaruteqaqisoq qaqissimammagu qutsavigeqqilaarusuppara.

Tassaagallarpullu Demokraatit oqallinnermut ilanngukkusutagut.